

Memoria xustificativa dun convenio de colaboración entre a Consellería de Presidencia, Xustiza e Deportes e o Concello de Brión para a execución do proxecto denominado Mellora da envolvente térmica da Escola Municipal de Música de Brión, que se tramita como expediente anticipado de gasto

## 1. Departamento que tramita o convenio

A Consellería de Presidencia, Xustiza e Deportes é o departamento da Xunta de Galicia ao cal lle corresponde a elaboración, proposta e execución da política do Goberno galego en materia de Administración local, de conformidade co previsto no Decreto 136/2024, de 20 de maio, polo que se establece a estrutura orgánica da Consellería de Presidencia, Xustiza e Deportes (DOG núm. 101, do 27 de maio).

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

## 2. Antecedentes

A Xunta de Galicia, a través da Consellería de Presidencia, Xustiza e Deportes, ten previsto asinar co Concello de Brión un convenio para a execución do proxecto denominado Mellora da envolvente térmica da Escola Municipal de Música de Brión.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da veciñanza, entre os que se atopan a protección do ambiente.

Pola súa banda, a Comunidade Autónoma de Galicia ten como obxectivo o desenvolvemento equilibrado do territorio galego, do medio rural e do urbano, do interior e da faixa costeira, que permita o progreso económico da totalidade do territorio e que a cidadanía galega teña unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos nosos concellos que son a Administración máis próxima aos administrados.

O obxectivo común é conseguir ou mellorar o funcionamento dos servizos e das infraestruturas municipais, de forma que os concellos poidan prestar servizos de calidade á veciñanza con independencia do seu lugar de residencia, coa finalidade de garantir a calidade ambiental, a prevención e mitigación de efectos adversos sobre o ambiente ou a atención ás emerxencias.

O artigo 25.5 da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental dispón que a distribución anual do Fondo regularase mediante orde ditada pola consellería competente en materia de réxime local, na que tamén se establecerán os criterios de repartición, os entes locais beneficiarios e as actuacións ás que se destinará a parte do fondo que non estiver destinada ás entidades cuxo termo municipal se atope dentro da poligonal de delimitación dun parque eólico ou resulten afectadas polas correspondentes instalacións de conexión.

Para tal fin, mediante a orde anual régulanse os criterios de repartición do Fondo de Compensación Ambiental e as actuacións ás que se destina, aplicándose parte do Fondo a actuacións específicas de protección do ambiente, é dicir, aquelas que teñen por obxecto a conservación da biodiversidade, o coñecemento e utilización recreativa e didáctica dos recursos naturais e máis a



recuperación do medio natural degradado ou contaminado, incluídas aquelas que teñen por obxecto a prevención, extinción e xestión de situacións de sinistro ou de risco (artigo 2.1.c).

Desde o punto de vista orzamentario, no proxecto de orzamentos da Xunta de Galicia para o ano 2026, no proxecto 2015 00168 existe un saldo de crédito axeitado e suficiente para a súa aplicación eficaz na colaboración coas entidades locais de Galicia apoiando aquelas actuacións de creación e/ou mellora de infraestruturas e equipamentos para a prestación de servizos municipais que teñan como finalidade a realización de actuacións específicas de protección do ambiente.

### 3. Finalidade

Para os efectos sinalados, tense previsto formalizar co Concello de Brión instrumento convencional ao que se refire esta memoria, por un período de vixencia que abrangue desde a súa sinatura a o 1 de novembro de 2026.

### 4. Obxecto do convenio

O obxecto do presente convenio é fixar as liñas de colaboración entre a Consellería de Presidencia, Xustiza e Deportes e o Concello de Brión para a execución do proxecto denominado Mellora da envolvente térmica da Escola Municipal de Música de Brión.

### 5. Fundamentos do convenio

O Concello de Brión manifestou a necesidade extraordinaria e urxente de asistencia por parte da Consellería de Presidencia, Xustiza e Deportes para acometer o proxecto denominado Mellora da envolvente térmica da Escola Municipal de Música de Brión, este proxecto ten por obxecto a mellora do illamento térmico desta edificación mediante o illamento térmico da fachada, colocando un illamento tipo SATE de 8 centímetros, a substitución das fiestras existentes e a renovación do sistema de iluminación.

No último mes as condicións meteorolóxicas e as fortes precipitacións, produciron a entrada de auga no edificio agravando de forma significativa o deterioro da Escola de Musica Municipal de Brión. No mes de outubro apareceron de gretas de gran envergadura na fachada; transversais, a altura do forxado da planta baixa, e verticais, próximas á carpintería exterior que causaron danos estruturais pola acumulación de auga na estrutura; danos nos acabados interiores e na instalación eléctrica, producindo o desprendemento da carpintería exterior.

A situación actual desta infraestrutura cultural é grave, observándose que, principalmente os días de chuvía, a auga penetra polos muros, producindo filtracións laterais que, ocasionan cortocircuitos e charcos no o pavimento o que ocasiona un risco importante de caídas nas zonas comúns e nas aulas. Estas circunstancias impiden o desenvolvemento normal das actividades propias deste edificio e poñen en risco a seguridade das persoas usuarias e traballadores.

Os signos de alerta que se evidencian na Escola Municipal de Musica de Brión, gretas, humidades, fungos, desprendemento de pintura e mofo nas paredes, demandan unha actuación inmediata para evitar o peche das instalacións que actualmente son utilizadas por 126 persoas diariamente, co fin de restablecer o funcionamento normal da escola, evitando o agravamento da situación e o risco de seguridade das persoas usuarias e traballadores.

Esta actuación adecúase aos criterios e obxectivos recollidos na orde reguladora do Fondo de Compensación Ambiental por tratarse dun proxecto de mellora da eficiencia enerxética da instalación dun edificio municipal.

As obras propostas son, polo tanto, urxentes e prioritarias sendo indispensable a súa execución inmediata para previr o risco existente para a seguridade e impedir o deterioro progresivo dos elementos estruturais, garantindo a continuidade da actividade deportiva municipal.



A necesidade da colaboración solicitada á Consellería acentúase pola confluencia doutros factores. Por unha banda, na actualidade non hai ningunha convocatoria en concorrencia á cal se poida acoller este proxecto nin se prevé nas próximas datas.

Por outra banda, a falta de recursos dun pequeno concello para poder acometer as devanditas actuacións, nun marco orzamentario restritivo, de austeridade e control do gasto público e necesariamente estable por imperativo legal para as entidades que integran a Administración local, configura un contexto do cal se derivan, entre outras consecuencias, a imposibilidade para o Concello de Brión de afrontar en solitario os compromisos económicos que a indispensable execución das actuacións obxecto de subvención, representan para a Facenda local.

Así pois, este convenio de colaboración responde ao interese público e social que representa a acción de fomento da Consellería de Presidencia, Xustiza e Deportes respecto da execución dunhas actuacións imprescindibles para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local lle atribúe aos concellos, como Administración máis próxima aos administrados; así mesmo, correspóndese con actuacións financiadas de conformidade cos criterios e obxectivos do Fondo de Compensación Ambiental e co proxecto orzamentario 2015 00168 Outras actuacións específicas de protección do ambiente.

A conxuntura descrita, a necesidade extraordinaria de asistencia manifestada polo Concello de Brión e o obxectivo da actuación, así como a existencia de crédito axeitado e suficiente para a súa aplicación eficaz no restablecemento dos servizos municipais sobre os cales se actuará a través do convenio que se pretende subscribir, unido ao cumprimento dos obxectivos do Fondo de Compensación Ambiental, acreditan a existencia de razóns de interese público que xustifican recorrer ao procedemento excepcional de concesión directa dunha subvención a favor do Concello de Brión.

## 6. Aplicación orzamentaria e importe

Para dar cumprimento aos obxectivos deste convenio, a Consellería de Presidencia, Xustiza e Deportes, a través da Dirección Xeral de Administración Local, achegará a cantidade máxima de SETENTA MIL EUROS (70.000,00€) con cargo á aplicación orzamentaria 05.04.141A.761.1 (C.P. 2015 00168) recollida no proxecto de Lei orzamentos xerais da Comunidade Autónoma para o ano 2026, na que existe crédito adecuado e suficiente. Este importe representa o 89,68% do orzamento total do proxecto que constitúe o obxecto deste convenio.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, con independencia de que, ao abeiro do previsto nos artigo 4 da devandita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, na data da sinatura electrónica  
A directora xeral de Administración Local

Natalia Prieto Viso  
(*documento asinado electronicamente*)

